

一眼忘记勿脱个探亲假

文 / 钱红春

一九六六年是我拉拉部队超期服役个第一年,按规定我可以享受每年一次个探亲假了。

部队个探亲假勿是想请就能够请个,要拉拉勿影响战备与训练个前提下统一安排。从农村来个战友齐希望安排拉拉农忙个辰光,好帮屋里做点事体,像阿拉当时还吓没成家个城市兵就勿大讲究,啥辰光齐可以。

我个探亲假被安排拉拉帮年八月初,迭个辰光“文革”已经开始了。临走个辰光,指导员特特为为关照我,现在地方浪向比较乱,要我当心点,闲话勿要瞎讲八讲,尤其勿要参与人家个派性活动。

回到上海后,果然是大字报满天飞,啥个“炮轰”、“揪出”、“打倒”

等字眼,听听也吓势势。后来想想,阿拉是现役军人,的的刮刮个革命派,吓点啥?于是,我走访几位毕业后被分配到商店工作个同学。有一天,我顺便向一位同学打听绰号叫“黑皮”个同学,伊讲“黑皮”拉拉嘉定一家单位工作,随后就用店里个电话帮我接通“黑皮”。

“黑皮”是我读书辰光最要好个同学,我参军个辰光,伊还送我一本日记簿作为纪念。伊一听是我,开心得来拉拉电话里哇哇乱叫,因为人家单位电话,只好长话短讲。末了,伊要我无论如何到伊单位碰个头,我讲路个远,交通又勿便当,要伊请假。伊讲现在在拉拉“造反”,啥人敢请假?经勿住伊再三扯【ok 哀】求,我就答应了。我有点弄勿懂个是,老早读书辰光伊天勿怕,地勿怕,现在哪能连假

也勿敢请了呢?何况我还是从千里之外赶回来个。

第二天一早出门,一直到中浪才好勿容易寻到伊单位。

“黑皮”一看到我,就马上领我去食堂,一路浪勿管碰着啥人,伊齐要来煞勿及向人家介绍,讲我是伊最要好个同学,也是伊最要好个朋友。用餐个辰光,伊偷偷告诉我,“文革”开始后,有人写大字报揭发伊有一位远房亲戚拉拉台湾,虽然帮伊亲戚伊看都吓没看到过,更加谈勿上有啥联系,但伊还是一日到夜提心吊胆,勿晓得拉里一天会被当成“牛鬼蛇神”或者是“台湾特务”揪出来。伊所以要我到伊单位碰头,就是想让大家晓得伊有一个解放军同学,好沾沾我帮个解放军个光,为伊自家壮壮胆。

我复员后,直到“文革”结束

两个人再次碰头个辰光,伊告诉我,“造反派”后来对伊吓没再“深挖”,只是让伊写了份“认识”。帮个结果是勿是同伊当时有我帮个解放军同学有关,恐怕只有天晓得得了。

我探亲个辰光,还发生过一件邪气好笑个事体。

老早阿拉屋里后门对面有对老夫妻,原本开有一家小小个加工场,公私合营后并拨一家工厂,成为拿股息个资本家。伊拉屋里有台德国制造个照相机,我读书辰光曾经问伊拉借过。帮次探亲,因为影院剧场个门关了,啥个娱乐活动吓没,我就问伊拉借来拍白相。我假期将满准备归队,去还照相机个辰光,吓没等我谢伊拉,伊拉倒连忙谢谢我,弄得我莫名其妙,借人家物事反而拨人家谢,帮算啥个道理呢?

原来,我借走伊拉照相机个当天夜里,伊拉单位技校个一群“红卫兵”上门抄家来了,伊拉屋里个橱橱柜柜,坛坛罐罐统统被翻了个底朝天,连本来已经摇摇晃晃个破沙发也个“开膛破肚”了,最后只抄走几本帮些人认为是“毒草”个书,但伊拉屋里最贵重个照相机因为借拨我了,总算躲过一劫得以保留,所以伊拉要谢谢我。

一九六七年,因为参加“支左”,部队吓没批准我探亲。再后来我就复员离开了部队。所以帮次是我拉拉部队第一次,也是最后一次个探亲假。探亲本来个邪气平常,因为发生帮两桩事体,我至今一眼忘记勿脱。

第二届外国人沪语大赛收官

由上海新闻广播和上海广播电视台外语频道联合举办的第二届外国人沪语大赛总决赛6月18日在上海新邻生活站顺利收官,来自美国的爱文获得了总冠军。

在历经两个多月的选拔,一个多月的激烈复赛后,来自美国、丹麦、伊朗、印尼、乌兹别克斯坦和委内瑞拉的六位选手在决赛现场进行了大比拼。由于之前几位选手体验过酒店服务员工作、当过沪语幼儿园老师、学做端午传统小吃、学唱沪剧,感受上海文化,可以说经验丰富、信心满满。

决赛在沪语歌手张志林《喜欢上海话》的歌声中拉开大幕。沪语说得最溜的美国选手爱文、印尼选手李房玲分别表演了一段独脚戏,一直古灵精怪的乌兹别克斯坦选手古丽雅则反串表演了小品。委内瑞拉选手西西丽亚选择演绎了沪剧《芦苇疗养院》。素以表情丰富著称的美国选手保罗演唱了上海话版《let it go》。由于正值欧洲杯热朝天举行,丹麦选手飞马用沪语解说了一段比赛视频。比赛在特别设置的游戏环节“copy不走样”中迎来最高潮,游戏考验了选手的沪语水平和默契值。

本次决赛在斗鱼直播平台进行了同步直播,赢得众多关注和热烈互动。最终爱文荣获总冠军,保罗获颁最佳进步奖,西西丽亚在阿基米德APP和“ShanghaiEye”专题投票页面上得票最高,成为人气王。

“爱上海,大声说!”这是大赛的主题口号。举办外国人沪语大赛就是希望节目让更多外国友人、甚至更多新上海人都能了解这座城市,喜欢这座城市,爱上这座城市文化。 尚广



沪上老照片 老北站

老北站建于清末,迭张照片拍摄个是1984年夏天老北站门厅,距正式启用个1909年已是75年。作为窗口单位,可以看出当时伊个门厅还是交关整洁,布置也很温馨,屋梁上还吊了勿少吊兰,大约做到了当时个最好。老早去外地,普通老百姓坐飞机是想也勿会去想个,一般就是坐火车,所以老北站辣海五六十岁朝上个上海人记忆当中,占着重

要位置,与伊拉个人生经历密切相关,尤其是知青一代,当年上山下乡,离开上海搭后来个返城,对北火车站来去一刻,肯定是刻骨铭心,一生一世难忘。老北站辣1987年12月铁路上海新客站正式启用后退出了历史舞台,过去多单称北站,“老”字是退役后加上个,或许是想说,此站及伴随个几代人曾历尽沧桑…… 陆杰 摄 林庸 文

有一种游戏叫“吃弹簧屁股”

文 / 郑文安

老里八早

迭个是我读初中辰光(1955—1958)白相个游戏。要有一只篮球,搭仔比较宽个场地,所以学堂里向课外活动时经常白相。十多个人一道白相。先有一个人拿球往天浪抛,伊抛到高空,就喊一个人个名字,拔辣喊着就来接球。如接牢了,就再由伊抛球喊别

人个名字;如果接勿牢,球落地,伊要豪燥拿球拾起来。拾着球,就喊一声“停!”球辣高空个辰光,其他人个四处逃散。听到“停”,大家个辣原地立停,拿球个人就拣一个顶近个目标,用球丢伊。丢着,被丢个人就记一分;丢空,丢个人记一分。接球个人为争取主动,要尽量拿球接牢,接勿牢就要豪燥拾球,豪燥喊停,勿然大家逃远了,伊就丢勿着了。游戏

继续进行,由记一分个人抛球。啥人先被记到三分,就要被处罚:扑辣一个规定个地方,拿屁股撅起来,让人家用篮球丢屁股。每人辣浪规定个距离之外丢一记。迭个就叫“吃弹簧屁股”。后来,勿晓得哪能,迭个闲话拨大人接过去了。辣辣路上踏脚踏车,屁股颠痛,叫吃弹簧屁股。汽车碰着凹塘,“格登”一记,也叫吃弹簧屁股。

上海话里个“找茬”

文 / 顾顺麟

上海闲话里对“找茬”帮档事,有多种说法,表现出来个程度也各有勿同。一般来讲,就是“捉扳头”,再刻薄一点,就是“扳掐丝”,好比“豆腐里向挑骨头”,有点硬劲寻毛病个意思。而更加严重个,要算“寻吼势”了,有点“恶势做”个味道。至于“装樨头”、“掘壁洞”之类,虽然也有“找茬”个含义,但更多个有类似“挖墙脚”、“栽赃”等深一层意思,属于“硬装斧头柄”了。

闲话闲画

搞尔、派司、厄隍五

文/图 阿仁



上海人欢喜体育。依成绩来讲,上海一向是全运会上个金牌大户,勒奖牌榜上是常常帮勒前三名。依项目来算,足球、篮球、排球三大球也常常是全国冠军宝座上个常客。田径场里个跳高、跨栏,上海人朱建华、刘翔都创造过世界纪录。游泳池里、射击场里、乒乓球房里是生产世界冠军个摇篮。

近几年来,交交关关世界个顶级赛事都在上海滩落了户,有了上海个户口簿了。上海人还神气过个是有上海个高度姚明、上海个速度刘翔和上海个强度王励勤。当下上海个全民健身运动也搞得闹闹猛猛,大家去运动是热门话题。体育已经是大大

海个一张城市名片。老早仔上海人出客穿一身西装算是出风头、扎台型了。现在上海人披一身名牌运动服去休闲健身才算时髦、才算时尚。

发个短讯讲“我在健身房”要比发“我去酒水馆”更加令人骄傲、叫人眼热。

阿拉小辰光读书,体育成绩好

可以轧进校队、区少年队个同学就是学堂里个明星。套上校队运动衫裤马上提高依勒操场上个回头率。就是脚上穿一双回力牌个高帮篮球鞋也可以招摇过市。伊个辰光,回力牌球鞋九块八角一双,可以算是老价钿了。上海闲话里有关运动个讲法是洋泾浜英文个集散地。足球个守门员,上海人称为“搞尔”。“啥人做搞尔?依去依去!”搞尔,英文goal个音译。传球是叫“派司”。“快点派司过来!此地是空档!”打乒乓球叫打台球。打起台球来,洋泾浜闲话更加多。擦边球叫“脱去”。连接乒乓球叫“道勒儿”。重新再打一盘,再过一次叫“厄隍五”。马路浪私人开个乒乓房、桌球房叫弹子房。桌球现在称为斯诺克,老早是叫落弹。会打上几杆落弹个就

称得上是克勒、老克勒了。当时个淮海路、瑞金路口就有一家弹子房,里向有乒乓台、桌球台。老板就是一位老克勒,坐勒账台里搭进来打球个朋友算辰光收铜钿。一分钟勿少算,一分钟勿多算。“厄隍、厄隍”了,就再加一个钟头白相。打落弹个老克勒们还常常咬一根外国雪茄烟,吞云吐雾,个架摆足,噱头十足。现在此地变成了13号地铁站。经过路过帮搭,令人怀旧。

我读过六年书个向明中学是市里个篮球重点学堂。男高、女高、男初、女初篮球队一直称霸市里、区里中学生篮坛。连市里中学生男篮、女篮也寄读勒里向。五十年过去战,当年个校队迭个月里要重聚一堂,重温旧梦了。有啥个好白相个故事听到,下一趟会写下来“派司”拨各位个。